

Chó-hā-pōng ê ki-bah pí iū-hā-pōng ê sī tēng-pē kāu; ōe kiu ê lát iāh sī tēng-pē. Chó iū ê hā-pōng lāi-bīn ê khang-khak tōa sòe chha-put-to pī<sup>n</sup>, ōe tōe-tit huih chha-put-to chit niú ê chōe.

### Lūn sim tín-tāng.

67. Sim ê ki-bah chit-ē kiu, chit-ē pàng, tui lâng chhut-sì kàu sī put-sī án-ni, lóng bô thêng chit khek á kú. Sim nā thêng-hioh chiū sí. Sim ê tín-tāng lóng chiàu chhù-sū, chiū-sī nīng ê siōng pōng tāi-seng kiu chit-ē lâi pek huih lóh hā pōng, jiān-āu nīng ê hā-pōng chiah kiu pek huih jip mēh-kíng, āu-lâi sim chiū hioh khah bô pōa<sup>n</sup> biáu cheng ê kú. Tng hioh ê sī huih ōe tui sim gōa sūn-sè lâu jip nīng pēng ū khang-khak ê siōng-pōng, sim sūi-sī chiū koh kiu chit-ē huih tēng-chài siū pek tui siōng-pōng lóh hā-pōng. Teh kiu ê sī kap teh hioh ê sī chí nīng chām pī<sup>n</sup>-pī<sup>n</sup> kú, chiū-sī 4 biáu cheng.

### Lūn sim ê sia<sup>n</sup>.

68. Sim phòk chit-ē lâng ōe thia<sup>n</sup>-kī<sup>n</sup> hit ê sia<sup>n</sup> ū nīng iū<sup>n</sup>. Hī-khang nā à<sup>n</sup>-lóh heng-chêng chiū ōe thia<sup>n</sup>-kī<sup>n</sup> lāi-bīn nīng ê sia<sup>n</sup> chiū-sī sim teh phòk ê sia<sup>n</sup>. Tāi-seng thia<sup>n</sup>-kī<sup>n</sup> khah bān koh tīng ê sia<sup>n</sup> chiū-sī huih chhiong sim-pōng ê mīng-hō, mīng khui ê sia<sup>n</sup>; tē jī sia<sup>n</sup> sī khah kín koh té ê chiū-sī huih tui mēh-kíng í-keng keng-kè pōan gōat mīng chiū koai<sup>n</sup> ê sia<sup>n</sup>, án-ni ōe thia<sup>n</sup>-kī<sup>n</sup> sim teh phòk nīng hō sia<sup>n</sup> jiān-āu chiū hioh 4 biáu cheng ê kú.

### Lūn-méh.

69. Sim-pōng kiu liáu-āu piàn seng-khu ê mēh-kíng liām-pī<sup>n</sup> ū huih chhiong-móá, só-í mēh sa<sup>n</sup> sòa phòk hit ê kín-bān kap sim ê phòk sa<sup>n</sup> tāng.

Ū kúi-nā só-chāi mēh-kíng phû khah chhut tī phê ē-tōe, nā bong chiū ōe chai mēh-kíng teh khí-lóh, teh tín-tāng. Tī chhiú-óá<sup>n</sup> pī<sup>n</sup> kap pīn-pī<sup>n</sup> ōe bong mēh chai i ê khí-lóh kap sim ê kiu-pàng sa<sup>n</sup> ìn-tap; mēh khah kūn tī sim chiū khah tāi-seng tē i khí-lóh, lī sim khah hīng chiū khah lō-bé.

70. Sim-phòk kap mēh ê khóan-sit bô tiā<sup>n</sup>-tiòh, ū ióng-lám kín-bān ê cheng-chha, í-kip lám-hū ló-iù ê bô tāng. Chit lâng ê kín-bān bô siōng-siōng sio-tāng, chiū-sī chiàu seng-khu ê ióng-lám lâi piàn-ōa<sup>n</sup> i ê mēh, tui án-ni i-seng bong mēh ōe chai seng-khu kúi-nā hāng tāi-chì.

Chiàu pēng-siōng ták lâng ê mēh-kó chit hun cheng ê tiong-kan phòk 72 ē, chóng-sī ū lâng khah kín ū lâng khah bān. Koh e<sup>n</sup>-á put-chí khah kín, 4 hè ê gín-á chha-put-to 100 ē. Lâu lâng khah bān tām pōh iok-liòk 65 ē. Lâng teh khùn ê sī mēh phòk khah bān, nā-sī chhut-lát chòe kang á-sī cháu sī khah kín.

Siat-sú chit lâng ê sim chit hun cheng ê tiong-kan phòk 70 pái chiū-sī chit jit 100800 paí, ták nî 36792000 pái. Sim sui-jian bô thêng hioh mīn kú kai-chài tī chit phòk chit phòk ê tiong-kan ōe hioh 4 biáu ê kú, só-í tī chit nî ê tiong-kan kiōng hioh 14716800 biáu ê kú chiū-sī 170 gōa jit ê kú.

### Lūn seng-khu ê sio-lō.

71. Huih teh liú-hêng mīn nā ōe iú<sup>n</sup>-chhī seng-khu, ū koh chit hāng iàu-kín ê kong-iōng chiū-sī ū koan-hē tī seng-khu sio-lō ê chiat-chè. Eñg hân-sú-chiam kâm chhùi-lāi chiàu